

Na osnovu člana 35. Zakona o prevenciji i suzbijanju korupcije u Kantonu Sarajevo („Službene novine Kantona Sarajevo“ broj: 35/22) (u daljem tekstu:Zakon), člana 65. Statuta J.U. Zavod za javno zdravstvo Kantona Sarajevo („Službene novine Kantona Sarajevo“ broj:49/13 i 21/22) , direktor donosi:

**PRAVILNIK
O POSTUPKU INTERNOG PRIJAVLJIVANJA KORUPCIJE U J.U. ZAVOD ZA
JAVNO ZDRAVSTVO KANTONA SARAJEVO**

**Član 1.
(Predmet Pravilnika)**

Ovim Pravilnikom uređuje se način internog prijavljivanja korupcije i drugih nepravilnosti u J.U. Zavod za javno zdravstvo Kantona Sarajevo (u daljem tekstu: Zavod), postupanje po zaprimljenim prijavama korupcije i drugih nepravilnosti, razmatranje zaprimljenih prijava korupcije i drugih nepravilnosti, obaveza obavještanja lica koje je prijavilo korupciju i druge nepravilnosti o poduzetim radnjama, zaštita lica koje prijavi korupciju i druge nepravilnosti i druga pitanja koja su vezana za interno prijavljivanje korupcije i drugih nepravilnosti u Zavodu.

**Član 2.
(Definicije)**

Pojedini pojmovi koji se koriste u ovom Pravilniku imaju sljedeća značenja:

"Korupcija" podrazumijeva zloupotrebu povjerene funkcije, radne obaveze ili posla od strane odgovornog lica ili radnika u Zavodu, koja može dovesti do sticanja privatne koristi.

"Korist" podrazumijeva imovinu ili imovinska i druga materijalna i nematerijalna prava.

"Lična usluga" podrazumijeva svako djelovanje kojim se odgovorno lice i zaposlenici obavezuje, uz naknadu ili drugu protuuslugu, obaviti određeni posao.

"Odgovorno" lice podrazumijeva direktora Zavoda.

"Ovlašteno lice" je lice ovlašteno od strane odgovornog lica za prijem i postupanje po prijavama korupcije.

"Prijavitelj korupcije" su radnici Zavoda kao i svako fizičko lice koje prijavi korupciju u Zavodu.

**Član 3.
(Pojam prijave i podnošenje prijave)**

- (1) Prijava korupcije je pismeno ili usmeno obavještenje koje sadrži informacije iz kojih proizilazi sumnja da je izvršena korupcija.
- (2) Prijava se može podnijeti putem protokola, putem pošte, putem elektronske pošte (e-mail) ili online sistema za prijavu korupcije na službenoj internet stranici Zavoda, putem kutije/sandučeta za prijavu ili usmeno izjaviti na zapisnik.
- (3) Tehnički sekretar je obavezan svakog radnog dana vršiti provjeru kutije/sandučeta za prijavu.

Član 4.
(Pojam internog prijavljivanja i prijave)

(1) Interno prijavljivanje postoji kada prijavitelj podnosi prijavu odgovornom licu Zavoda ili ovlaštenom licu da je u Zavodu izvršena korupcija.

Član 5.
(Pravo prijave)

Radnik i svako fizičko lice ima pravo da prijavi bilo koji oblik korupcije u Zavodu za koji sazna na bilo koji način.

Član 6.
(Sadržaj prijave)

(1) Prijava sadrži:

- a) podatke o prijavitelju korupcije;
- b) podatke o licu za koje prijavitelj sumnja da je izvršilo korupciju, ukoliko prijavitelj ima informacije o tome u trenutku podnošenja prijave;
- c) opis radnje ili ponašanja koje se prijavljuje kao korupcija, uz navođenje konkretnih činjenica i okolnosti iz kojih proizilazi sumnja prijavitelja da je izvršena korupcija.
- d) podatke i dokumentaciju iz koje proizilazi sumnja da je izvršena korupcija, ukoliko istim raspolaže

Član 7.
(Ovlaštena lica)

Odgovorno lice imenuje ovlaštena lica za prijem prijave korupcije i za postupanje po prijavama.

Član 8.
(Postupak sa prijavom)

- (1) Postupak internog prijavljivanja počinje kada prijavitelj prijavu podnese odgovornom licu Zavoda ili ovlaštenom licu na neki od načina predviđenih u članu 3. ovog Pravilnika.
- (2) Nakon prijema prijave ovlašteno lice dužno je utvrditi da li prijava ispunjava uslove propisane odredbom člana 6. ovog Pravilnika.
- (3) Ukoliko prijava ne ispunjava uslove propisane odredbom člana 6. ovog Pravilnika ovlašteno lice obavijestiti će prijavitelja, čiji mu je identitet poznat, da u roku sedam dana od dana prijema obavijesti prijavu dopuni.
- (4) Ukoliko prijavitelj ne postupi u skladu sa stavom (3) ovog člana smatrat će se da je odustao od prijave i ovlašteno lice nije dužno postupiti po navedenoj prijavi.
- (5) Ovlašteno lice dužno je postupati i po anonimnim prijavama koje sadrže sve podatke propisane odredbom članom 6. ovog Pravilnika.

Član 9.
(Radnje nakon zaprimanja prijave)

- (1) Nakon što Ovlaštena lica utvrde da prijava korupcije sadrži sve Pravilnikom propisane elemente ovlašteno lice dužno je:
 - a) postupiti po prijavi bez odlaganja, a najkasnije u roku od 30 dana od dana prijema prijave;

- b) osigurati zaštitu ličnih podataka i anonimnost prijavitelja;
- c) poduzeti mjere i aktivnosti kojima će se spriječiti ili otkloniti nastupanje štetne radnje;
- d) osigurati zaštitu i ostvarivanje prava prijavitelja;
- e) utvrditi osnovanost prijave korupcije, odnosno druge nepravilnosti u konkretnom slučaju. U cilju utvrđivanja osnovanosti prijave ovlaštena lica imaju, kada je isto neophodno radi utvrđivanja osnovanosti prijave, pravo neposrednog uvida u predmete, akte i službene prostorije u Zavodu kao i pravo da uzimaju izjave od zaposlenika u Zavodu vezano za predmet prijave o čemu se sačinjava službena zabilješka. Na osnovu provedenih radnji ovlaštena lica dužna su sačiniti izvještaj direktoru u kojem će, dati mišljenje o osnovanosti prijave a odgovorno lice će donijeti Odluku o ishodu postupka po podnesenoj prijavi;
- f) u slučaju kada su ovlaštena lica, utvrdila da prijava ima osnova, te da se na osnovu prijave ili radnji provedenih na utvrđivanju njene osnovanosti može zaključiti da navedeno djelo ima obilježja disciplinske odgovornosti, o istom će pismeno informisati odgovorno lice Zavoda koje će poduzeti mjere na utvrđivanju disciplinske i materijalne odgovornosti lica koje je izvršilo korupciju;
- g) obavijestiti prijavitelja o mjerama i aktivnostima poduzetim po podnesenoj prijavi, u roku od 30 dana od dana podnošenja prijave. Anonimni podnositelj prijave će biti obaviješten o poduzetim prethodnim i finalnim radnjama, ako postoji odgovarajuća tehnička mogućnost dvosmjerne komunikacije sa anonimnim prijaviteljem;
- h) dostaviti prijavitelju odluku o ishodu postupka po podnesenoj prijavi korupcije, u roku od osam dana od dana okončanja postupka po prijavi;
- i) u slučaju sumnje ovlaštenih lica Zavoda da prijava ukazuje na izvršenje prekršaja, o istom će pismeno informisati odgovorno lice Zavoda koje će prijavu, u roku pet dana od dana prijema, proslijediti organu ovlaštenom za inspeksijski nadzor;
- j) u slučaju kada su ovlaštena lica Zavoda utvrdila da prijava ukazuje na izvršenje krivičnog djela o istom će pismeno informisati odgovorno lice Zavoda koje će prijavu, u roku pet dana od dana prijema prijave proslijediti nadležnom tužilaštvu ili drugom organu;
- k) obavijestiti Ured o borbi protiv korupcije i upravljanje kvalitetom o ishodu postupka po podnesenoj prijavi korupcije, u roku od osam dana od dana okončanja postupka po prijavi.

Član 10.

(Poduzimanje radnji u cilju otklanjanja štetnih posljedica počinjenog djela)

- (1) U slučaju da je prilikom provođenja prethodne radnje razmatranja osnovanosti prijave utvrđeno da ista ima osnova, Odgovorno lice će poduzeti potrebne radnje radi sprječavanja daljeg nepravilnog postupanja i otklanjanja štetnih posljedica počinjenog djela.
- (2) Svi radnici u Zavodu dužni su, u okviru svojih nadležnosti i ovlaštenja, poduzeti potrebne radnje radi sprječavanja daljeg nepravilnog postupanja i otklanjanja štetnih posljedica počinjenog djela.

Član 11.

(Zaštita prava podnositelja prijave)

- (1) Prijavitelj ne smije trpiti posljedice zbog prijave korupcije.

- (2) Prijava korupcije predstavlja opravdan razlog za vjerovanje da je informacija bila istinita u trenutku kada je podnesena prijava.
- (3) Odgovorno lice institucije ne smiju stavljati prijavitelja u nepovoljniji položaj u vezi sa prijavom korupcije kojim može imati štetne posljedice koje su propisane članom 45. stav 2. Zakona o prevenciji i suzbijanju korupcije u Kantonu Sarajevo.

Član 12.
(Interna zaštita)

- (1) Postupak interne zaštite pokreće prijavitelj koji trpi štetnu radnju iz člana 2. stav 1. tačka u) Zakona, podnošenjem zahtjeva odgovornom licu Zavoda.
- (2) Zahtjev iz stava (1) ovog člana podnosi se u roku od 30 dana od dana saznanja za štetnu radnju, a najkasnije u roku od godinu dana od dana nastanka štetne radnje.
- (3) Odgovorno lice Zavoda dužno je odlučiti o zahtjevu u roku od 30 dana od dana podnošenja zahtjeva.
- (4) U slučaju da odgovorno lice institucije utvrdi osnovanost zahtjeva iz stava 1. ovog Pravilnika dužno je bez odlaganja poduzeti mjere i aktivnosti kojima će se otkloniti akt činjenja ili nečinjenja koji je utvrđen kao štetna radnja.

Član 13.
(Eksterna zaštita)

- (1) Postupak eksterne zaštite pokreće prijavitelj koji trpi štetnu radnju iz člana 2. stav 1. tačka u) Zakona, podnošenjem tužbe nadležnom sudu.
- (2) Tužba iz stava (1) ovog člana podnosi se u roku od 30 dana od dana saznanja za štetnu radnju, a najkasnije u roku od godinu dana od dana nastanka štetne radnje.
- (3) Ukoliko prijavitelj nije zadovoljan odlukom iz člana 12. stav (3) ovog Pravilnika, a koju je donijelo odgovorno lice Zavoda u postupku interne zaštite ili ukoliko odgovorno lice Zavoda ne donese odluku u roku od 30 dana od dana podnošenja zahtjeva iz člana 12. stav (1) ovog Pravilnika, prijavitelj može tražiti sudsku zaštitu.
- (4) Prijavitelj može zahtijevati eksternu zaštitu i kada nije prethodno tražio internu zaštitu.

Član 14.
(Zabrana zloupotrebe prijavljivanja korupcije)

- (1) Zabranjena je zloupotreba prijavljivanja korupcije.
- (2) Zloupotreba iz stava (1) ovog člana postoji kada prijavitelj dostavlja informacije za koje u momentu prijavljivanja zna da nisu istinite.
- (3) Zloupotreba prava prijavljivanja predstavlja povredu radne dužnosti.

Član 15.
(Obaveza upoznavanja sa odredbama Pravilnika)

- (1) Odgovorno lice i rukovodioci imaju obavezu upoznati sve zaposlenike o pravima i obavezama iz ovog Pravilnika
- (2) Pravilnik će biti objavljen na oglasnim pločama Zavoda te web stranici Zavoda.
- (3) Svi zaposlenici u Zavodu dužni su da potpišu izjavu o tome da su upoznati sa pravima i obavezama iz ovog Pravilnika.

Član 16.
(Stupanje Pravilnika na snagu)

- (1) Ovaj Pravilnik stupa na snagu danom donošenja.

Broj:05.10.89-6307/22

Sarajevo, 05.10.2022.godine

